

"SLUŽBENE NOVINE KANTONA SARAJEVO", BROJ 7/08

Na osnovu člana 18. tačka b) i člana 30. stav 2. Ustava Kantona Sarajevo ("Službene novine Kantona Sarajevo", broj 1/96, 2/96, 3/96, 16/97, 14/00, 4/01 i 28/04) i člana 46. Zakona o organizaciji organa uprave u Federaciji Bosne i Hercegovine ("Službene novine Federacije BiH", broj 35/05), Skupština Kantona Sarajevo, na sjednici od 28. februara 2008. godine, donijela je

**ZAKON
O ORGANIZACIJI I DJELOKRUGU ORGANA UPRAVE I UPRAVNIH ORGANIZACIJA
KANTONA SARAJEVO**

POGLAVLJE I - OSNOVNE ODREDBE

Član 1.

(Osnivanje kantonalnih organa uprave i upravnih organizacija)

Ovim Zakonom osnivaju se organi uprave i upravne organizacije Kantona Sarajevo (u daljnjem tekstu: Kanton), utvrđuje njihov djelokrug i uređuju druga pitanja od značaja za njihovo organizovanje i funkcionisanje.

Član 2.

(Organi koji vrše poslove uprave)

Poslove uprave, stručne i s njima povezane upravne poslove iz okvira nadležnosti Kantona vrše kantonalna ministarstva, kantonalne uprave i kantonalne upravne organizacije, utvrđene ovim Zakonom.

Član 3.

(Odnos ministarstva prema upravi, odnosno upravnoj organizaciji u sastavu ministarstva)

U poslovima iz nadležnosti kantonalne uprave, odnosno kantonalne upravne organizacije koje se nalaze u sastavu kantonalnog ministarstva, ministar donosi podzakonske propise i opće akte za izvršavanje kantonalnih zakona iz tih oblasti i vrši upravni nadzor nad radom te uprave, odnosno organizacije, u skladu sa zakonom.

Član 4.

(Odgovornost direktora kantonalne uprave, odnosno kantonalne upravne organizacije)

Direktor kantonalne uprave, odnosno kantonalne upravne organizacije za svoj rad i rad uprave, odnosno upravne organizacije kojom rukovodi odgovoran je i to:

- a) direktor samostalne kantonalne uprave, odnosno samostalne kantonalne upravne organizacije - Vladi Kantona;
- b) direktor kantonalne uprave, odnosno kantonalne upravne organizacije u sastavu kantonalnog ministarstva - ministru i Vladi Kantona.

Član 5.

(Zastupljenost)

- (1) U kantonalnim ministarstvima, kantonalnim upravama i kantonalnim upravnim organizacijama osigurava se proporcionalna zastupljenost konstitutivnih naroda i grupe Ostalih, u skladu s Amandmanom XIX (član 11a.) Ustava Kantona Sarajevo, kao i ravnopravna zastupljenost spolova.
- (2) Gramatička terminologija korišćenja muškog roda u ovom zakonu podrazumijeva uključivanje oba roda.

POGLAVLJE II - KANTONALNI ORGANI UPRAVE

Odjeljak A - Kantonalna ministarstva

Član 6.

(Kantonalna ministarstva)

- (1) Kantonalna ministarstva su:
 - a) Ministarstvo pravde i uprave,
 - b) Ministarstvo prostornog uređenja i zaštite okoliša,
 - c) Ministarstvo stambene politike,
 - d) Ministarstvo saobraćaja,
 - e) Ministarstvo unutrašnjih poslova,
 - f) Ministarstvo privrede,

- g) Ministarstvo finansija,
- h) Ministarstvo zdravstva,
- i) Ministarstvo obrazovanja i nauke,
- j) Ministarstvo kulture i sporta,
- k) Ministarstvo za rad, socijalnu politiku, raseljena lica i izbjeglice i
- l) Ministarstvo za boračka pitanja.

Odjeljak B - Djelokrug kantonalnih ministarstava

Član 7.

(Ministarstvo pravde i uprave)

Ministarstvo pravde i uprave vrši upravne i stručne poslove utvrđene ustavom, zakonom i drugim propisima, koji se odnose na ostvarivanje nadležnosti Kantona u oblasti pravosuđa, pravobranilaštva, uprave i lokalne samouprave, poslove upravne inspekcije, poslove davanja mišljenja o usklađenosti zakona i drugih propisa koje donosi Skupština Kantona, Vlada Kantona i rukovodioci kantonalnih organa uprave, sa Evropskom konvencijom o zaštiti ljudskih prava i osnovnih sloboda i drugim instrumentima za zaštitu ljudskih prava, koji imaju pravnu snagu ustavnih odredaba, kao i druge upravne poslove koji ne spadaju u djelokrug drugog organa uprave Kantona.

Član 8.

(Ministarstvo prostornog uređenja i zaštite okoliša)

- (1) Ministarstvo prostornog uređenja i zaštite okoliša vrši upravne i stručne poslove utvrđene ustavom, zakonom i drugim propisima, koji se odnose na ostvarivanje nadležnosti Kantona u oblasti prostornog uređenja, zaštite okoliša i komunalnih djelatnosti
- (2) U sastavu Ministarstva prostornog uređenja i zaštite okoliša je Uprava za geodetske i imovinsko-pravne poslove.
- (3) Uprava za geodetske i imovinsko-pravne poslove vrši upravne i druge stručne poslove utvrđene zakonom i drugim propisima, koji se odnose na ostvarivanje nadležnosti Kantona u oblasti geodetskih i imovinsko-pravnih poslova.

Član 9.

(Ministarstvo stambene politike)

- (1) Ministarstvo stambene politike vrši upravne i stručne poslove utvrđene ustavom, zakonom i drugim propisima, koji se odnose na ostvarivanje nadležnosti Kantona u oblasti stambene izgradnje, obnove i rekonstrukcije i poslove stambene inspekcije.
- (2) U sastavu Ministarstvo stambene politike, obnove je Uprava za stambena pitanja.
- (3) Uprava za stambena pitanja vrši upravne i druge stručne poslove koji se odnose na prvostepeni upravni postupak po zakonima iz oblasti stambenih odnosa i aktima o provođenju tih zakona.

Član 10.

(Ministarstvo saobraćaja)

- (1) Ministarstvo saobraćaja vrši upravne i stručne poslove utvrđene ustavom, zakonom i drugim propisima, koji se odnose na ostvarivanje nadležnosti Kantona u oblasti saobraćaja.
- (2) U sastavu Ministarstva saobraćaja je Direkcija za puteve, kao kantonalna upravna organizacija, koja ima svojstvo pravnog lica.
- (3) Direkcija za puteve vrši stručne poslove pretežno privrednog karaktera i sa njima povezane upravne poslove utvrđene zakonom i drugim propisima, koji se odnose na nadležnosti Kantona u izgradnji, rekonstrukciji, održavanju, zaštiti i upravljanju putevima.

Član 11.

(Ministarstvo unutrašnjih poslova)

Ministarstvo unutrašnjih poslova vrši upravne i stručne poslove utvrđene Ustavom, zakonom i drugim propisima, koji se odnose na ostvarivanje nadležnosti Kantona u oblasti unutrašnjih poslova i poslove inspeksijskog nadzora nad radom agencija za zaštitu ljudi i imovine.

Član 12.

(Ministarstvo privrede)

- (1) Ministarstvo privrede vrši upravne i stručne poslove utvrđene Ustavom, zakonom i drugim propisima, koji se odnose na ostvarivanje nadležnosti Kantona u oblasti privrede, vodoprivrede, poljoprivrede, šumarstva i lovstva, veterinarstva, industrije i energetike, obrta, korišćenja prirodnih bogatstava, kantonalnog turizma i turističkih resursa, trgovine i ugostiteljstva.
- (2) U sastavu Ministarstva privrede su Uprava za šumarstvo i Direkcija za turizam.
- (3) Uprava za šumarstvo vrši upravne i druge stručne poslove utvrđene zakonom i drugim propisima, koji se odnose na ostvarivanje nadležnosti Kantona u oblasti šumarstva.
- (4) Direkcija za turizam vrši stručne i s njima povezane upravne poslove utvrđene zakonom i drugim propisima, koji se odnose na ostvarivanje nadležnosti Kantona u oblasti turizma i turističkih resursa Kantona.

Član 13.

(Ministarstvo finansija)

Ministarstvo finansija vrši upravne i stručne poslove utvrđene Ustavom, zakonom i drugim propisima, koji se odnose na ostvarivanje nadležnosti Kantona u oblasti finansija i poslove budžetske inspekcije.

Član 14.

(Ministarstvo zdravstva)

Ministarstvo zdravstva vrši upravne i stručne poslove utvrđene Ustavom, zakonom i drugim propisima, koji se odnose na ostvarivanje nadležnosti Kantona u oblasti zdravstva.

Član 15.

(Ministarstvo obrazovanja i nauke)

- (1) Ministarstvo obrazovanja i nauke vrši upravne i stručne poslove utvrđene Ustavom, zakonom i drugim propisima, koji se odnose na ostvarivanje nadležnosti Kantona u oblasti obrazovanja i nauke.
- (2) U sastavu Ministarstva obrazovanja i nauke je Prosvjetno-pedagoški zavod.
- (3) Prosvjetno-pedagoški zavod vrši stručne i s njima povezane upravne poslove utvrđene zakonom i drugim propisima, koji se odnose na ostvarivanje nadležnosti Kantona u oblasti predškolskog, osnovnog i srednjeg obrazovanja.

Član 16.

(Ministarstvo kulture i sporta)

Ministarstvo kulture i sporta vrši upravne i stručne poslove utvrđene Ustavom, zakonom i drugim propisima, koji se odnose na ostvarivanje nadležnosti Kantona u oblasti kulture i sporta i poslove inspekcije za sport.

Član 17.

(Ministarstvo za rad, socijalnu politiku, raseljena lica i izbjeglice)

Ministarstvo za rad, socijalnu politiku, raseljena lica i izbjeglice vrši upravne i stručne poslove utvrđene Ustavom, zakonom i drugim propisima, koji se odnose na ostvarivanje nadležnosti Kantona u oblasti rada, socijalne politike, raseljenih lica i izbjeglica.

Član 18.

(Ministarstvo za boračka pitanja)

Ministarstvo za boračka pitanja vrši upravne i stručne poslove utvrđene Ustavom, zakonom i drugim propisima, koji se odnose na ostvarivanje nadležnosti Kantona u oblasti zaštite branioca, dobrovoljaca i organizatora otpora, veterana, učesnika rata, ratnih vojnih invalida, mirnodopskih vojnih invalida, porodica šehida i porodica poginulog, umrlog, nestalog branioca i nosioca najviših ratnih priznanja, ratnih vojnih zarobljenika i učesnika Narodnooslobodilačkog antifašističkog rata 1941.-1945. godine, na području Kantona, vođenje i podržavanje aktivnosti na očuvanju tekovina odbrambeno-oslobodilačkog rata 1992-1995. godine, održavanju manifestacija i drugih sličnih projekata.

Odjeljak C - Samostalne kantonalne uprave

Član 19.

(Samostalne kantonalne uprave)

Samostalne kantonalne uprave su:

- a) Kantonalna uprava za inspeksijske poslove
- b) Kantonalna uprava civilne zaštite.

Član 20.

(Kantonalna uprava za inspeksijske poslove)

(1) Kantonalna uprava za inspeksijske poslove vrši inspeksijske poslove iz nadležnosti kantonalnih inspekcija koje su organizovane u njenom sastavu i druge upravne i stručne poslove, u skladu sa zakonom i drugim propisima.

(2) Kantonalne inspekcije u sastavu Kantonalne uprave za inspeksijske poslove su:

- a) tržišno - turistička inspekcija (tržna inspekcija i turističko-ugostiteljska inspekcija);
- b) zdravstvena inspekcija;
- c) farmaceutska inspekcija;
- d) sanitarna inspekcija;
- e) inspekcija rada (inspekcija rada, inspekcija zaštite na radu i inspekcija socijalne zaštite);
- f) urbanističko-ekološka inspekcija (urbanističko-građevinska inspekcija, inspekcija zaštite okoliša, inspekcija zaštite prirode i inspekcija za zaštitu dobara baštine);
- g) saobraćajna inspekcija (inspekcija drumskog saobraćaja i inspekcija za ceste),
- h) poljoprivredna inspekcija;
- i) šumarsko-lovna inspekcija
- j) vodna inspekcija;
- k) veterinarska inspekcija;
- l) tehnička inspekcija (elektroenergetska inspekcija i termoeenergetska inspekcija);
- m) inspekcija zaštite od požara;
- n) komunalna inspekcija i
- o) prosvjetna inspekcija.

Član 21.

(Djelokrug Kantonalne uprave civilne zaštite)

Kantonalna uprava civilne zaštite vrši upravne i stručne poslove utvrđene zakonom i drugim propisima, koje se odnose na ostvarivanje nadležnosti Kantona u oblasti zaštite i spašavanja i poslove inspekcije civilne zaštite.

POGLAVLJE III- SAMOSTALNE KANTONALNE UPRAVNE ORGANIZACIJE

Odjeljak A - Vrste samostalnih upravnih organizacija

Član 22.

(Samostalne kantonalne upravne organizacije)

(1) Samostalne kantonalne upravne organizacije su:

- a) Zavod za planiranje razvoja Kantona Sarajevo,
- b) Zavod za izgradnju Kantona Sarajevo,
- c) Zavod za informatiku i statistiku Kantona Sarajevo,
- d) Direkcija za robne rezerve Kantona Sarajevo,
- e) Profesionalna vatrogasna brigada Kantona Sarajevo.

(2) Samostalne upravne organizacije iz stava (1) ovog člana imaju svojstvo pravnog lica.

Odjeljak B - Djelokrug samostalnih upravnih organizacija

Član 23.

(Zavod za planiranje razvoja Kantona Sarajevo)

Zavod za planiranje razvoja Kantona Sarajevo vrši određene stručne i druge poslove koji pretežno zahtijevaju primjenu stručnih i naučnih metoda rada i sa njima povezane upravne poslove, koji se odnose na:

- a) planiranje prostornog i društveno-ekonomskog razvoja Kantona;
- b) izradu, čuvanje i stavljanje na stalni javni uvid planova prostornog uređenja i davanje stručnih mišljenja i informacija u postupku izdavanja urbanističke saglasnosti, u skladu sa zakonom;

- c) rad i razvoj geografsko-informacionog sistema Kantona, koji se odnosi na nadležnosti Kantona u oblasti planiranja razvoja;
- d) vršenje drugih stručnih poslova utvrđenih zakonom i drugim propisima, odlukama Vlade Kantona i Skupštine Kantona.

Član 24.

(Zavod za izgradnju Kantona Sarajevo)

Zavod za izgradnju Kantona Sarajevo (u daljnjem tekstu: Zavod) vrši određene stručne i druge poslove, u ime i za račun Kantona, koji pretežno zahtijevaju primjenu stručnih i naučnih metoda rada i sa njima povezane upravne poslove, koji se odnose na:

- a) realizaciju projekata građenja od interesa za Kanton, počevši od podnošenja prijedloga za eksproprijaciju nekretnina i zahtjeva za preuzimanje i dodjelu potrebnog zemljišta, do dobijanja upotrebne dozvole;
- b) opremanje građevinskog zemljišta za građenje prema uslovima iz urbanističke saglasnosti koju izdaje Ministarstvo prostornog uređenja i zaštite okoliša;
- c) uspostavljanje, vođenje i ažuriranje analognog i digitalnog katastra komunalnih uređaja;
- d) pripremanje i opremanje građevinskog zemljišta koje mu odlukom ili ugovorom povjere općine u Kantonu i Grad Sarajevo;
- e) upravljanje i raspolaganje imovinom Zavoda u skladu s namjenom utvrđenom zakonom;
- f) računovodstvo sredstava uređenja građevinskog zemljišta, naknade za pogodnosti i posebne naknade iz osnova legalizacije bespravno izgrađenih objekata;
- g) zastupanje u upravnim i sudskim postupcima koji proizađu iz obavljanja poslova iz djelokruga Zavoda;
- h) obavljanje i drugih stručnih poslova iz nadležnosti Kantona u oblasti izgradnje infrastrukture i uređenja građevinskog zemljišta koje mu povjeri Kanton.

Član 25.

(Zavod za informatiku i statistiku Kantona Sarajevo)

Zavod za informatiku i statistiku Kantona Sarajevo vrši stručne i druge poslove koji pretežno zahtijevaju primjenu stručnih i naučnih metoda rada i sa njima povezane upravne poslove iz oblasti informatike i statistike, kao i druge poslove, koji se odnose na:

- a) planiranje i razvoj jedinstvenog informacionog prostora Kantona, Grada Sarajeva i općina na području Kantona, zasnovanog na elektronskoj obradi podataka i usmjerenog prema korisnicima,
- b) razvoj i upravljanje integralnim računarskim sistemom organa uprave, upravnih organizacija i stručnih službi Kantona, uključujući infrastrukturu, internet i internet prisustvo, elektronsku poštu i elektronsko upravljanje dokumentima,
- c) analizu, dokumentovanje, optimizaciju poslovnih procesa i razvoj projekata za organe uprave, upravne organizacije i stručne službe Kantona,
- d) pripremu, izradu nacrti i provođenje programa statističkih istraživanja od interesa za Kanton koji postoje kao obaveza u okviru programa statističkih istraživanja,
- e) organizovanje i provođenje statističkih istraživanja od značaja za praćenje ekonomskog razvoja Kantona Sarajevo, kao i obradu statističke građe za potrebe Vlade, organa uprave, upravnih organizacija i stručnih službi Kantona, u skladu sa Zakonom o statistici F BiH,
- f) analizu, obradu, objavljivanje i ažuriranje statističkih podataka, te izdavanje statističkih mjesečnih i godišnjih biltena i godišnjaka Kantona,
- g) druge poslove koje mu povjeri Skupština Kantona i Vlada Kantona.

Član 26.

(Direkcija za robne rezerve Kantona Sarajevo)

Direkcija za robne rezerve Kantona Sarajevo vrši stručne poslove pretežno privrednog karaktera i sa njima povezane upravne poslove iz nadležnosti Kantona, koji se odnose na:

- a) nabavku, uskladištenje, distribuciju i transport robnih rezervi Kantona (osnovni poljoprivredno - prehrambeni proizvodi, nafta, naftni derivati i dr.);
- b) intervencije na tržištu, u slučaju poremećaja u snabdijevanju ili nekontrolisanog rasta cijena osnovnih prehrambenih proizvoda, nafte i naftnih derivata;
- c) distribuciju roba iz robnih rezervi krajnjim korisnicima;
- d) nabavku i distribuciju roba za potrebe javnih kuhinja i drugih humanitarnih organizacija na području Kantona, u skladu sa zahtjevima Vlade Kantona i nadležnih kantonalnih ministarstava;

- e) vršenje drugih stručnih poslova utvrđenih zakonom i drugim propisima, odlukama Vlade Kantona i Skupštine Kantona

Član 27.

(Profesionalna vatrogasna brigada Kantona Sarajevo)

Profesionalna vatrogasna brigada Kantona Sarajevo vrši stručne i druge poslove iz nadležnosti Kantona, koji se odnose na:

- a) učestvovanje i sprovođenje preventivnih mjera zaštite od požara i drugih nezgoda,
- b) učestvovanje u gašenju požara, spašavanju ljudi i imovine ugroženih požarom i drugim elementarnim nesrećama i vršenje drugih poslova utvrđenih Planom zaštite od požara /u daljem tekstu: Plan i vršenju kontrole sprovođenja mjera zaštite od požara utvrđenih Planom, kao i onih mjera čije nesprovođenje može imati uticaj na blagovremenost i smanjenje efikasnosti vatrogasne intervencije, kao što su funkcionalnost i ispravnost vodozahvata, hidranata, aparata za gašenje požara, odlaganje zapaljivih tečnosti i gasova i drugih zapaljivih materijala u podrumima, tavanima i drugim mjestima gdje predstavljaju opasnost, prohodnost požarnih puteva i prilaza električnim razvodnim tablama, hidrantima, aparatima, blokadnim ventilima gasnih instalacija i instalacija sa zapaljivim tečnostima, zabranu korišćenja otvorenog plamena i pušenja na požarno ugroženim prostorima;
- c) opravku i servisiranje vatrogasnih vozila, motornih pumpi, vatrogasnih i izolacionih aparata i ostale vatrogasne opreme za sopstvene potrebe, kao i za potrebe trećih lica, na osnovu ugovora;
- d) organizovanje kurseva i seminara za stručnu obuku i osposobljavanje radnika iz oblasti zaštite od požara, po utvrđenom programu;
- e) pružanje stručne pomoći organizacijama, preduzećima, drugim pravnim licima i samostalnim privrednicima, radi otklanjanja nedostataka u zaštiti od požara u njihovim objektima i vršenje protivpožarnog obezbjeđenja objekata;
- f) učestvovanje u radu stručnih komisija obrazovanih za oblast protivpožarne zaštite;
- g) vršenje drugih stručnih poslova utvrđenih zakonom i drugim propisima, odlukama Vlade Kantona i Skupštine Kantona.

POGLAVLJE IV - PRELAZNE I ZAVRŠNE ODREDBE

Član 28.

(Nastavljanje rada ministarstava)

Stupanjem na snagu ovog Zakona, u skladu sa djelokrugom utvrđenim ovim Zakonom, nastavljaju da rade:

- a) Ministarstvo pravde i uprave,
- b) Ministarstvo prostornog uređenja i zaštite okoliša,
- c) Ministarstvo unutrašnjih poslova,
- d) Ministarstvo privrede,
- e) Ministarstvo finansija,
- f) Ministarstvo zdravstva,
- g) Ministarstvo obrazovanja i nauke,
- h) Ministarstvo kulture i sporta,
- i) Ministarstvo za rad, socijalnu politiku, raseljena lica i izbjeglice i
- j) Ministarstvo za boračka pitanja.

Član 29.

(Nastavak rada Kantonalne uprave civilne zaštite)

Stupanjem na snagu ovog Zakona, u skladu s djelokrugom utvrđenim ovim Zakonom nastavlja da radi Kantonalna uprava civilne zaštite.

Član 30.

(Nastavak rada kantonalnih upravnih organizacija)

Stupanjem na snagu ovog Zakona, u skladu s djelokrugom utvrđenim ovim Zakonom nastavljaju da rade:

- a) Zavod za planiranje razvoja Kantona Sarajevo,
- b) Zavod za izgradnju Kantona Sarajevo,
- c) Zavod za informatiku i statistiku Kantona Sarajevo,
- d) Direkcija za robne rezerve Kantona Sarajevo i

e) Profesionalna vatrogasna brigada Kantona Sarajevo.

Član 31.

(Nastavljanje obavljanja funkcije)

Stupanjem na snagu ovog Zakona, rukovodioci kantonalnih organa iz čl. 28, 29 i 30. ovog Zakona, imenovani, odnosno postavljeni do stupanja na snagu ovog Zakona, nastavljaju obavljati funkciju rukovodilaca tih kantonalnih organa.

Član 32.

(Usklađivanje pravilnika o unutrašnjoj organizaciji)

U roku od 60 dana od dana stupanja na snagu ovog Zakona, rukovodioci kantonalnih organa iz čl. 28, 29 i 30. ovog Zakona dužni su uskladiti pravilnike o unutrašnjoj organizaciji tih organa sa djelokrugom utvrđenim ovim Zakonom.

Član 33.

(Prestanak s radom ministarstava)

Stupanjem na snagu ovog zakona prestaju s radom:

- a) Ministarstvo stambenih poslova i
- b) Ministarstvo prometa i komunikacija.

Član 34.

(Početak rada ministarstava)

Stupanjem na snagu ovog Zakona, u skladu s djelokrugom utvrđenim ovim Zakonom, počinju s radom:

- a) Ministarstvo stambene politike i
- b) Ministarstvo saobraćaja

Član 35.

(Nastavljanje obavljanja funkcije)

Stupanjem na snagu ovog Zakona ministar stambenih poslova nastavlja obavljati funkciju ministra stambene politike, a ministar prometa i komunikacija nastavlja obavljati funkciju ministra saobraćaja.

Član 36.

(Preuzimanje državnih službenika i namještenika, arhive, dokumentacije i sredstava rada)

Ministarstva iz člana 34. ovog Zakona preuzimaju državne službenike i namještenike, arhivu i dokumentaciju i sredstva rada ministarstava iz člana 33. ovog Zakona.

Član 37.

(Usklađivanje pravilnika o unutrašnjoj organizaciji)

U roku od 60 dana od dana stupanja na snagu ovog Zakona, ministri iz člana 35. ovog Zakona dužni su uskladiti pravilnike o unutrašnjoj organizaciji ministarstava sa djelokrugom utvrđenim ovim Zakonom.

Član 38.

(Početak rada Kantonalne uprave za inspekcijske poslove)

- (1) Kantonalna uprava za inspekcijske poslove počinje s radom danom postavljenja direktora.
- (2) Direktor Kantonalne uprave za inspekcijske poslove postaviće se u roku od tri mjeseca od dana stupanja na snagu ovog Zakona.

Član 39.

(Preuzimanje inspekcijskih poslova iz ministarstava)

Danom početka rada, u skladu s djelokrugom utvrđenim ovim Zakonom, Kantonalna uprava za inspekcijske poslove preuzima inspekcijske poslove koji su bili u djelokrugu kantonalnih ministarstava, i to:

- a) Iz Ministarstva prostornog uređenja i zaštite okoliša:
 - 1) urbanističko-građevinsku inspekciju,
 - 2) ekološku inspekciju-inspekciju zaštite okoliša,
 - 3) inspekciju zaštite prirode,
 - 4) komunalnu inspekciju i
 - 5) inspekciju zaštite od požara;
- b) iz Ministarstva prometa i komunikacija:
 - 1) inspekciju drumskog saobraćaja i

- 2) inspekciju za ceste;
- c) iz Ministarstva privrede:
 - 1) tržišnu inspekciju,
 - 2) turističko-ugostiteljsku inspekciju,
 - 3) veterinarsku inspekciju,
 - 4) vodoprivrednu inspekciju,
 - 5) šumarsko-lovnu inspekciju,
 - 6) poljoprivrednu inspekciju,
 - 7) elektroenergetsku inspekciju i
 - 8) termo-energetsku inspekciju;
- d) iz Ministarstva zdravstva:
 - 1) zdravstvenu inspekciju
 - 2) farmaceutsku inspekciju i
 - 3) sanitarnu inspekciju;
- f) iz Ministarstva kulture i sporta: inspekciju za zaštitu dobara baštine;
- g) iz Ministarstva za rad, socijalnu politiku, raseljena lica i izbjeglice:
 - 1) inspekciju rada,
 - 2) inspekciju zaštite na radu i
 - 3) inspekciju socijalne zaštite;
- h) iz Ministarstva obrazovanja i nauke:
 - 1) prosvjetnu inspekciju.

Član 40.

(Preuzimanje kantonalnih inspektora)

Kantonalna uprava za inspekcijske poslove, istovremeno s preuzimanjem poslova preuzima i kantonalne inspektore koji se zateknu na poslovima u tim ministarstvima, kao i državne službenike i namještenike čiji je posao neposredno vezan za poslove inspekcije.

Član 41.

(Preuzimanje arhive, dokumentacije i sredstava rada)

Arhivu, dokumentaciju i sredstva rada inspekcija koje prelaze u Kantonalnu upravu za inspekcijske poslove preuzima Kantonalna uprava za inspekcijske poslove.

Član 42.

(Obavljanje inspekcijskih poslova do preuzimanja u Kantonalnu upravu za inspekcijske poslove)

Do preuzimanja inspekcija u Kantonalnu upravu za inspekcijske poslove, postojeće kantonalne inspekcije iz člana 39. ovog Zakona nastavljaju da rade u okviru ministarstava u kojima su bile organizovane do dana početka rada Kantonalne uprave za inspekcijske poslove.

Član 43.

(Donošenje Pravilnika o unutrašnjoj organizaciji Kantonalne uprave za inspekcijske poslove)

Direktor Kantonalne uprave za inspekcijske poslove dužan je donijeti Pravilnik o unutrašnjoj organizaciji u roku od 60 dana od dana imenovanja.

Član 44.

(Početak rada Direkcije za turizam u sastavu Ministarstva privrede)

- (1) Direkcija za turizam u sastavu Ministarstva privrede počinje s radom danom postavljanja direktora.
- (2) Direktor Direkcije za turizam postaviće se u roku od tri mjeseca od dana stupanja na snagu ovog Zakona.

Član 45.

(Prestanak važenja dosadašnjih zakona)

Danom stupanja na snagu ovog Zakona, prestaje da važi Zakon o ministarstvima Kantona Sarajevo ("Službene novine Kantona Sarajevo", br. 4/01, 13/02, 16/03 i 26/04) i Zakon o samostalnim kantonalnim upravnim ustanovama ("Službene novine Kantona Sarajevo", br. 14/97,7/98,13/99 i 28/01).

Član 46.

(Stupanje na snagu Zakona)

Ovaj Zakon stupa na snagu osmog dana od dana objavljivanja u "Službenim novinama Kantona Sarajevo".